

桓兮馬躑躅以悲鳴攀扶桑而仰觀兮假九日於天
皇瞻沉雲之泱泱兮哀吾願之不將又愁霖賦曰夫
何季秋之淫雨兮旣彌日而成霖瞻玄雲之晻晻兮
聽長雷之淋淋中宵夜而歎息起飾帶而撫琴

魏應瑒愁霖賦曰聽屯雷之恒音兮聞左右之歎聲
情慘憤而含欷兮起披衣而遊庭三辰幽而重關蒼
曜隱而無形雲曖曖而周馳雨濛濛而霧零排房帳
而北入振蓋服之沾衣還空牀而寢息夢白日之餘
暉惕中寤而不效兮意悽悒而增悲

晉潘尼苦雨賦曰氣觸石而結蒸兮雲膚合而仰浮